

quel estoit planté un fantosme tout armé tenant la lance au poing.

Tout le dict chasteau estoit remply au dedans de fagotz et buches en grande quantité, avec force paille et une infinité de fusées, tappareaulx et feuz artificielz s'entretenans l'ung à l'autre et environnans le dict chasteau.

Là survindrent les arquebouziers de la dicte ville en tres brave equipage, conduictz par leurs dictz cappitaine, lieutenant et enseigne, lesquelz après avoir fait une revue à l'entour dudict chasteau se vindrent tous renger par esquadre en quatre bastillons qu'on avoit dressé devant le dict chasteau chacun à l'endroit de chesque courtine dudict chasteau et de mesme distance l'ung de l'autre.

A l'entour dudict chasteau étoient affigez mains escripteaulx et huictains entourez et circuitz d'une coronne de herre, que nous avons recueilliz et mys cy après.

Après que les dictz harquebouziers furent posez en leurs bastillons, Messieurs les Eschevins de la dicte ville vindrent présenter la torche allumée à Monsieur le Gouverneur, pour mettre le feu audict chasteau, ce qu'il accepta et feist tres voullentiers et eulx de compaignie.

Estant le dict chasteau tout enflambé, les dictz arquebouziers faisoient yssue de leurs bastillons, et à beaulx coups de arquebouzes assailloyent le dict chasteau, ainsi et à la forme que le cappitaine Sainct Marc, sergent major des compaignies de la dicte ville, leur avoit ordonné et qui si est merveilleusement bien adressé les escadrons de soldatz comme estant tres expert en tel affaire.

Tous les tabours et fifres, trompectes et clairons alors ne cesserent de sonner à l'alarme, comme la citadelle de délascher et tirer coups d'artillerie, tandis que brusloit et fouldroyoit le dict chasteau. Et dura ce passe temps et plaisant feu de joye long temps.

S'ensuiet les huictains et sonnetz qui estoient affigez autour dudict chasteau.